

In'experientscha musicala

■ (cp) **Trais musicistas e dus musicists da jazz s'inscuntran a Glion. Els han in project: Inspirads d'ina excursiun en la Ruinaulta creeschan els lur musica. Trais dis improviseschan ed exerciteschan els. A la fin datti in concert en il Cinema sil Plaz a Glion.** RTR Radiotevisiun Svizra Rumantscha mussa il film «In'experientscha musicala» dad Ivo Zen dumengia, ils 19 d'october 2014 a las 17.25 sin SRF 1.

Valeria Zangger (battaria), Martina Berther (bass electric), Ursina Giger (vusch), Niculin Janett (saxofon) ed Andi Schnoz (ghitarra electrica) èn giuvens musicists da jazz. Dasper lur atgnas bands èn els er engaschads en autras gruppas sco musicists u dattan lecziuns da musica. La passiuun cuminaivla da tuts tschintg è l'improvisaziun, la retschertga da novas furmas musicalas.


«Negin'idea tgei ch'ei dat or da quei» è la reflexiun da la bassista Martina Berther al cumenzament da quest'aventura che ha manà els a Glion en il Cinema sil Plaz. Las musicistas as conuschian per part e tscherts han era gia sunà ensemen. «Nus essan da casa en stils da musica fetg differents», fa valair Martina Berther.

En ses film «In'experientscha musicala» ha il cineast Ivo Zen accompagnà il process creativ da las musicistas e dals musicists. Il film mussa la naschientscha

e la transformaziun d'in toc musical da l'emprima idea fin a sia preschentaziun davant in public. La sbrinzla che dat lieu a l'inspiraziun è l'excursiun ch'ils tschintg fan ensemen en la Ruinaulta. Il punct da partenza dals musicists po esser in purtret concret ubain era mental, mintgant er in pled. «Co tunan l'aua ed il crap?» sa dumonda la chantadura Ursina Giger. Il ghitarrist Andi Schnoz piglia la nivla che munta si dal terren sco element per crear sia musica. La percusiunista Valeria Zangger s'interessa al tun da tut quai che vegn ad ella en maun. Durant improvisaziuns, discussiuns animadas e provas intensivassas transfurman las ideas per daventar pli e pli fitg tocs musicals cun in'atgna identitad.

«Jazz, quai è mia musica», di il giuven saxofonist Niculin Janett cun segirezza. El saja creschì si en ina famiglia cun blera musica engiadinaisa, ma era cun jazz. «La musica engiadinaisa es bella. Il jazz però am permetta da far bella musica ed implü dad avair la libertà dad experimentar!», concluda Niculin Janett sia ponderaziun. Uschia permetta il film «In'experientscha musicala» era da seguir la transformaziun d'ina chanzun sursilvana tradiziunala en in jazz contemporan.

RTR Radiotevisiun Svizra Rumantscha mussa il film «In'experientscha musicala» dumengia, ils 19 d'october 2014 a las 17.25 sin SRF 1.



Scena or dal film «In'experientscha musicala» realisà da Radiotevisiun Svira Rumantscha.